



續文獻通考

郊社考

祀山川

宋

理宗淳祐十二年十二月。詔海神為大祀。春秋遣從臣

奉命往祠。理宗紀

潛說友咸淳臨安志曰。海神壇在東青門外太平橋之東。淳祐十二年有旨。中興以來。依海建都。宜以海神為大祀。下太常議。詔守臣馬光祖建殿。望



祭自寶祐之元。歲以春秋二仲。遣從官行事。

遼

太祖七年十一月。祠木葉山。太祖紀

按木葉山在永州。為契丹始祖肇迹之地。遼興尊為鎮山。歲時臨幸。於拜山過樹。及詣菩薩堂後。必親致祭。兼及遼河之神。傳世九帝。史不絕書。望祭遣祠。亦間舉焉。茲於太祖始祀書之。餘不悉載。

天贊三年八月。次古單于國。登阿里典。壓得斯山。以鹿

鹿祭。太祖紀

太宗天顯四年。仍太祖元不改三月。望祀羣神。太宗紀

穆宗應歷十四年七月。以酒脯祀黑山。穆宗紀

聖宗統和七年二月。分遣巫覡。祭名山大川。聖宗紀

十三年八月。詔修山澤祠宇。以時祀之。聖宗紀

開泰六年五月。祠木葉山。潢河。聖宗紀

遼俗。歲十月。五京進紙造小衣甲槍刀器械萬副。十

五日。天子與羣臣望祭木葉山。用國字書狀。并焚之。

國語謂之戴辣。戴燒也。辣甲也。冬至日。屠白羊白馬白鴈。各

取血和酒。天子望拜黑山。黑山在境北。俗謂國人魂

魄其神司之。猶中國之岱宗云。每歲是日。五京進紙人馬萬餘事。祭山而焚之。俗甚嚴畏。非祭不敢近山。

禮志

金

世宗大定四年六月初定祭五嶽四瀆禮。世宗紀

禮官言嶽鎮海瀆當以五郊迎氣日祭之。詔依典禮以四立土王日就本廟致祭。其在他界者遙祀。立春祭東嶽於泰安州。東鎮於益都府。東海於萊州。東瀆大淮於唐州。立夏望祭南嶽衡山。南鎮會稽山於河

南府。南海南瀆大江於萊州。季夏土王日祭中嶽於河南府。中鎮霍山於平陽府。立秋祭西嶽華山於華州。西鎮吳山於隴州。望祭西海。西瀆於河中府。立冬祭北嶽恒山於定州。北鎮醫巫閭山於廣寧府。望祭北海。北瀆大濟於益州。其封爵並仍唐宋之舊。每歲遣使奉御署祝版。奩香乘驛詣所在。率郡邑長貳官行事。禮用三獻。讀祝官一。捧祝官二。盥洗官二。爵洗官二。奉爵官一。司尊彝一。禮直官四。以州府司吏充。

禮志



金史范拱傳曰。大定七年。除太常卿議郊祀。或有言前代都長安及汴洛。以太華等山列為五嶽。今既都燕。當別議五嶽名。寺僚取崧高疏。周都豐鎬。以吳嶽為西嶽。拱以為非。是議略曰。軒轅居上谷。在恒山之西。舜居蒲坂。在華山之北。以此言之。未嘗據所都而改祀也。後遂不改。

十五年三月。冊長白山神為興國靈應王。禮志

十二年。有司言長白山在興王之地。禮合尊崇。議封爵。建廟宇。十二月。禮部太常學士院奏。奉勅旨。封興

國靈應王。即其山北地建廟宇。至是。奏定封冊儀物。冠九旒。服九章。玉圭。玉冊。函香幣。冊祝。遣使副各一員。詣會寧府。行禮官散齋三日。致齋一日。所司於廟中陳設如儀。廟門外設玉冊。衮冕。幄次。牙杖。旗鼓。從物等。視一品儀。禮用三獻。祭如嶽鎮。自是每歲降香。命有司春秋二仲。擇日致祭。禮志

二十一年。冊大房山神為保陵公。禮志

以大房山為祖宗陵寢所在。特錫公爵。冕八旒。服七章。圭冊香幣。使副持節行禮。並如冊長白山之儀。申

勅有司。歲時奉祀。其封域之內。禁無得樵採弋獵。著為令。是後遣使山陵行禮畢。山陵官以一獻禮致奠。禮志

二十五年。冊混同江神為興國應聖公。禮志

有司言。昔太祖征遼。策馬徑渡江。神助順。靈應昭著。宜修祠宇。加賜封爵。乃封神為公。致祭如長白山之儀。冊禮視保陵公故事。禮志

冊上京護國林神為護國嘉蔭侯。禮志

冊禮毳冕七旒。服五章。信圭。遣使詣廟。以三獻禮祭。

告。是後遇月七日。上京幕官一員行香。著為令。禮志

二十七年四月。冊盧溝河水神為安平侯。禮志

十九年。有司言。盧溝河水勢泛決。嚙民田。乞官為封冊神號。禮官以祀典所不載。難之。已而特封安平侯。建廟。每歲委本縣長官春秋致祭如令。禮志 河渠志

金史徒單克寧傳曰。初盧溝河決。久不能塞。加封河神安平侯。久之水復故道。上曰。鬼神雖不可窺測。即獲感應如此。克寧奏曰。神之所佑者正也。人事乖則弗享矣。報應之來。皆由人事。上曰。卿言是



也。世宗頗信神仙浮圖之事。故克寧及之。

章宗明昌四年八月。冊胡土白山神為瑞聖公。禮志

胡土白山。即麻達葛山。大定八年。世宗幸金蓮川。七

月丙戌。次冰井。章宗生於茲山之下。世宗喜其地行

而氣清。因以命名。後更山名曰胡土白。並建廟焉。至

是以冕服玉冊封神為公。命撫州有司春秋二仲。擇

日致祭為常。冊文有云。念誕彌之初度。由翊衛之効

靈。蓋不忘誕生之自云。至明年六月。以出獵登是山。

酌酒再拜。禮志 章宗紀 參

十二月。冊長白山神為開天弘聖帝。章宗紀

備袞冕玉冊儀物。帝御大安殿。用黃麾立仗八百人。

行仗五百人。遣使冊之。禮志

六年九月。冊靜寧山神為鎮安公。禮志

靜寧山。舊名旺國崖。太祖伐遼。嘗駐蹕於此。世宗大

定八年五月。始更今名。後復建廟。是年。以冕服玉冊

加封號焉。禮志

十二月。詔加五鎮四瀆王爵。章宗紀

封沂山為東安王。吳山為成德王。霍山為應靈王。會

稽山為永興王。醫巫閭山為廣寧王。淮為長源王。江為會源王。河為顯聖靈源王。濟為清源王。從沂山道士楊道全請也。禮志

宣宗貞祐三年十一月。遣叅知政事行河南尚書省侯摯祭河神於宜村。宣宗紀

哀宗天興三年正月。冊柴潭神為護國靈應王。哀宗紀遣官祭嶽鎮海瀆儀。

前三日。應行事執事官散齋二日。治事如故。宿於正寢如常儀。前二日。有司設行事執事官次於廟門外。

掌廟者掃除廟之内外。前一日。有司牽牲詣祠所。享官以下常服。閱饌物。視牲充膾。享日。丑前五刻。執事者設祝版於神位之右。置爵於坫。及以血豆陳於饌所。次設祭器。皆藉以席。掌饌者實之。左十簋。為三行。以右為上。實以乾稊。乾棗。形鹽。魚鱗。鹿脯。榛。實。乾。桃。菱。芡。栗。右十豆。為三行。以左為上。實以芹。苴。筍。苴。韭。菹。葵。苴。菁。苴。魚。醢。兔。醢。豚。拍。鹿。臠。醢。醢。左簋二。實以梁。稻。右簋二。實以稷。黍。俎二。實以牲體。次設犧尊二。象尊二。在堂上東南隅。北向。西上。犧尊在前。實以法。



酒犧尊初獻官酌象尊亞終獻酌又設太尊一山尊一在神位前設而不酌有司設燭於神位前洗二在東階之下直東甃北向壘在洗東加勺篚在洗西南肆實以巾執壘篚者位於其後又設揖位於廟門外初獻在西東向亞終及祝在東南向北上開瘞坎於廟內庭之壬地享日丑前五刻執事官各就次掌饌者帥其屬實饌具畢凡祭官各服其服與執事官行止皆贊者引點視陳設訖退就次引初獻以下詣廟南門外揖位立定贊禮者贊揖次引祝升堂就位立

次引初獻詣盥洗位北向立搯笏盥手帨手執笏詣爵洗位北向立搯笏洗爵以爵授執事者執笏升堂詣酌尊所西向立執事者以爵授初獻初獻搯笏執爵執尊者舉冪執事者酌酒初獻以爵授執事者執笏詣神位前北向立搯笏跪執事者以爵授初獻初獻執爵三祭酒奠爵訖執笏俛伏興少立次引祝詣神位前東向立搯笏跪讀祝訖執笏興退復位初獻再拜贊禮者引初獻復位次引亞獻酌獻並如初獻之儀次引終獻並如亞獻之儀贊者引初獻官詣神

位前北向立。執事者以爵酌清酒。進初獻之右。初獻跪。祭酒。啐酒。奠爵。執事者以俎進。減神座前胙肉。前脚第二節。共置一俎上。以授初獻。初獻以授執事者。初獻取爵。遂飲。卒爵。執事者進受爵。復於坫。初獻興。再拜。贊者引初獻復位。贊者曰。已飲福。受胙者不拜。亞獻官以下皆再拜。拜訖。次引初獻以下就望。瘞位。以饌物置於坎。東西廂各二人。贊者曰。可瘞。置土半坎。又曰。禮畢。遂引初獻以下出。祝與執尊壘篚冪者俱復位立定。贊者曰。再拜。再拜訖。遂出祝版。燔於齋。

所禮志

元

太祖十七年三月。封崑崙山為元極王。大鹽池為惠濟

王。

郭寶玉傳

時討契丹遺族。十六年。帝駐大雪山前。抄馬都鎮撫

郭寶玉。請封山川神。從之。

郭寶玉傳

世祖中統二年七月。遣使持香幣祀嶽瀆。

世祖紀

嶽鎮海瀆。代祀。自是年始。凡十有九處。分五道。後乃以東嶽東海東鎮北鎮為東道。中嶽淮瀆濟北海南



嶽南海南鎮為南道北嶽西嶽后土河瀆中鎮西海  
西鎮江瀆為西道既而又以驛騎迂遠復為五道道  
遣使二人集賢院奏遣漢官翰林院奏遣蒙古官出  
璽書給驛以行其禮物則每處歲祀銀香合一重二  
十五兩五嶽組金幢二鈔五百貫四瀆織金幡二鈔  
二百五十貫四海五鎮銷金幡二鈔二百五十貫至  
則守臣奉詔使行禮皇帝登寶位遣官致祭降香幡  
合如前禮惟各加銀五十兩五嶽各中統鈔五百貫  
四瀆四海五鎮各中統鈔二百五十貫或有禱禮

亦如之

祭祀志

至元三年定歲祀嶽鎮海瀆之制

祭祀志

正月東嶽鎮海瀆土王日祀泰山於泰安州沂山於  
益都府界立春日祀東海於萊州界大淮於唐州界  
三月南嶽鎮海瀆立夏日遙祭衡山土王日遙祭會  
稽山皆於河南府界立夏日遙祭南海大江於萊州  
界六月中嶽鎮土王日祀嵩山於河南府界霍山於  
平陽府界七月西嶽鎮海瀆土王日祀華山於華州  
界吳山於隴縣界立秋日遙祭西海大河於河中府

界十月北嶽鎮海瀆土王日祀恒山於曲陽縣界醫  
巫閭山於遼陽廣寧路界立冬日遙祭北海於登州  
界濟瀆於濟源縣祀官以所在守土官為之既有江  
南乃罷遙祭祭祀志

四年正月封昔木土山為武定山其神曰武定公泉為  
靈淵其神曰靈淵侯世祖紀

七年二月築昭應宮於高梁河世祖紀

按水經注濕水又東南高梁之水注焉水出薊州  
西北平地泉東注經燕王陵北又東逕薊城北又

按字之如巨等  
僅之字  
八

東南流入濕水魏征北將軍建城鄉侯劉靖始導  
高梁河造戾陵遏開車箱渠灌田其後興廢不常  
至元二十九年都水監郭守敬導白浮甕山諸泉  
水至西門入都城東至通州河成名通惠其時於  
義和門外西北一里置西城牌即古高梁河也是  
年築宮河上名曰昭應疑為祀河神而設而他無  
可證姑載之以俟考

十二年二月立河瀆廟於河中世祖紀

十四年七月回水窩淵聖廣源王加封善佑常山靈濟



昭應王。加封廣惠安邱電泉靈霈侯。加封靈霈公。世祖紀

十六年五月。進封桑乾河洪濟公為顯應洪濟公。世祖紀

按桑乾河神。是年已勅進封。而世祖紀又載至元

二十二年二月。加封桑乾河神洪濟公為顯應洪

濟公。於舊號無所增加。其為重載無疑。或別加封

字。而史失載。然不可考矣。

十七年十二月。修桐栢山淮瀆祠。世祖紀

二十二年十月。修南嶽廟。二十七年九月。修南海廣

德王廟。世祖紀

二十一年閏五月。加封衛輝路小清河神為洪濟威惠

王。世祖紀

二十八年二月。詔加嶽瀆四海封號。各遣官詣祠致祭。

世祖紀

中統初。遣道士或副以漢官。至是年正月。帝謂中書

省臣言曰。五嶽四瀆祠事。朕宜親往。道遠不可。大臣

如卿等。又有國務宜遣重臣代祠之。漢人遣名儒及

道士習祀事者。是月命加嶽瀆海神封號。詔曰。朕惟

名山大川國之秩祀。今嶽瀆四海皆在封宇之內。民

物阜康時惟神休而封號未加無以昭答靈貺可加  
上東嶽為天齊大生仁聖帝南嶽司天大化昭聖帝  
西嶽金天大利順聖帝北嶽安天大貞元聖帝中嶽  
中天大寧崇聖帝加封江瀆為廣源順濟王河瀆靈  
源弘濟王淮瀆長源溥濟王濟瀆清源善濟王東海  
廣德靈會王南海廣利靈孚王西海廣潤靈通王北  
海廣澤靈祐王仍各遣官詣神致告以稱朕敬恭明  
神之意祭祀志參  
元典章

成宗大德二年二月詔諸王駙馬毋擅祀嶽鎮海瀆成宗

紀

先是元年六月諸王也里干遣使乘驛祀嶽瀆命追  
其驛券仍切責之因有是令成宗  
紀

元史刑法志曰諸五嶽四瀆五鎮國家秩祀有常  
諸王公主駙馬輒遣人降香致祭小民僭禮犯義  
以祈禱褻瀆者並禁之

東平布衣趙天麟上太平金鏡策畧曰臣聞天子  
祭天地及天下之名山大川諸侯祭社稷及名山  
大川之在其地者大夫祭五祀士祀宗廟庶人祭



祖考於寢。上得兼下。下不得僭上。皆有制以節之。今國家稱秩元祀。咸秩無文。既有禮部太常司侍儀司以備其節文。又詔令所在官司。歲時致祭五嶽四瀆。名山大川。歷代聖帝明王。忠臣節士之載在祀典者。皆其宜也。竊見方今小民不安常典。妄事明神。其類甚多。不可枚舉。夫東嶽者。太平天子告成之地。東方藩侯當祀之山。今乃有倡優戲謔之徒。貨殖屠沽之子。每年春季。四方雲聚。有不遠千里而來者。有提挈全家而至者。干越邦典。滌瀆

神明。停廢產業。耗損食貨。亦已甚矣。伏望陛下。申明前詔。使天下郡縣官。各祭名山大川。聖帝明王。忠臣節士。在其地者。凡下民當祭之神。如祖考及門庭戶竈等。聽之。凡非典所當祀而祀者。禁之。無令妄瀆。凡祈神賽社。漿酒藿肉。飾立神像。泥金鏤木者。禁之。無令妄費。如是則非但巫風寢消。抑

亦富民一助。

名臣奏議

三月。詔加五鎮封號。

成宗紀

東鎮沂山為元德東安王。南鎮會稽山為昭德順應

按自是年一  
修冊

王。西鎮吳山為成德永靖王。北鎮醫巫閭山為貞德  
廣寧王。中鎮霍山為崇德應靈王。勅有司歲時與嶽  
瀆同祀。著為令式。成宗紀 參 祭祀志

按是年加鎮山封號。互見成宗紀。祭祀志。而紀中  
獨遺中鎮封號。書成倉卒。其掛漏不檢類如此。

泰定帝泰定二年閏正月。浙江道廉訪司請慎擇代祀

之使。泰定 帝紀

言四方代祀之使。棄公營私。多不誠潔。以是神不歆  
格。請慎擇之。泰定 帝紀

四年十月。改封建德路烏龍山神為忠顯靈澤普佑孚

惠王。泰定 帝紀

致和元年四月。改封蒙山神為嘉惠昭應王。洞庭廟神  
為忠惠順利靈濟昭佑王。泰定 帝紀

順帝至正元年十二月。加封真定路滹沱河神為昭佑

靈源侯。順帝 紀

十一年四月。加封河瀆神為靈源神。祐弘濟王。仍重建

河瀆廟。順帝 紀

先是元年。河決。遣禮部尚書泰不華。以珪玉白馬。致



祭河神四年。河決白茅堤。又決金堤。方數千里。民被其患。五載不能塞。是年中書右丞相脫脫用都漕運使前工部郎中賈魯計。請塞之。入奏稱旨。乃命魯以工部尚書為總治河防使。四月鳩工。十一月水土工畢。諸堤埽成。河復故道。帝遣貴臣報祭河伯。至是乃加封。并重建廟焉。泰不華傳。叅河渠志。脫脫賈魯傳。

重建西海神廟。

順帝紀。

山西通志曰。西海神廟在蒲州府永濟縣南門外。宋以立秋日於河中府河瀆廟望祭。元至元十二

年。勅建西海神廟於河中。春秋致祭。及祭告儀幣。一視河瀆禮。

按西海神自唐以後。皆於河瀆廟望祭。至元初始。即河中府別建廟。考世祖紀。至元十二年立河瀆等廟。而不及西海。蓋史失之。據是年重建之文。繫於河瀆之下。則前此立廟河中。可知叅互以證。足明史傳之缺。

二十一年十一月。黃河清。遣官祀河神。

順帝紀。

黃河自平陸三門磧。下至孟津。五百餘里。皆清。凡七

按字上如巨著堂  
三字

日命秘書少監程徐祀之。順帝紀

按史嶽鎮海瀆元世祖時代祀幾無虛歲其後歷朝亦修祀事惟謹或命重臣或遣羽士或一歲徧祠或因事專祭其有司歲時之祀不與焉大率徼福之舉居多故不悉載

明

太祖吳元年八月祀山川。太祖實錄

洪武元年正月命使往登萊祭海神。太祖實錄時遣道士周原德往祭原德未至前數日濱海民見

海濤恬息聞空中若有神語者皆驚異及原德至臨祭靈風清肅海潮響應父老皆欣喜相賀謂原德曰海濤不息者十餘年矣今聖人應運太平有兆何幸

身親見之原德還奏帝悅。太祖實錄

三月遣官祭魯山淮川之神。太祖實錄

二年正月分建地祇壇。太祖實錄

帝以太歲山川諸神合祭城南未有壇壝命禮官定制至是禮官議上略曰虞舜祭四嶽王制始有五嶽之稱周官小宗伯兆四望於四郊鄭注以四望為五

明字抄寫太祖  
二十

按字上原臣等  
三十一



嶽四鎮四瀆。詩序曰。巡狩而祀四嶽河海。則又有四海之祭。蓋天子方望之事。無所不通。而嶽鎮海瀆。在諸侯封內。則各以其方祀之。秦罷封建。嶽瀆皆領於祠官。及漢復建諸侯。則侯國各祀其封內山川。天子不預焉。武帝時。諸侯或分或廢。五嶽皆在天子之邦。宣帝時。始有使者持節代祠嶽瀆之禮。由魏及隋。嶽鎮海瀆。皆即其地立祠。命有司致祭。唐宋之制。有命本界刺史縣令之祀。有因郊祀望祭之祀。又有遣使之祀。元遣使祀嶽鎮海瀆。分東西南北中爲五道。其

天下山川之祀。虞書曰。望於山川。徧於羣神。周頌曰。懷柔百神。周禮小宗伯。兆山川邱陵墳衍。各因其方。王制。凡山川之小者。其祭秩視伯子男。其在諸侯封內者。諸侯又自祭之。如楚祭睢漳。晉祭惡池。齊祭配林。是已。秦罷封建。則皆領於祠官。由漢唐以及宋元。嶽鎮海瀆之外。又有羣山川之祀。今宜以嶽鎮海瀆及天下山川。城隍諸地祇。合爲一壇。與天神埒。春秋專祀。遂定祭日。以清明霜降。壇高廣視天神。前期一日。皇帝躬省牲。至日。服通天冠。絳紗袍。詣嶽鎮海瀆。

前行三獻禮。山川等神分獻。官行禮。於是祀地祇。則五嶽五鎮四海四瀆並列。南向。次鍾山。江東西淮。兩浙江西湖廣山東山西河南陝西北平福建廣東廣西海南海北左右兩江山川之神。並京都各府城隍外夷山川之神。皆東西相向。位皆用犢一羊一豕一。籩豆各八。簋各二。酒尊三。帛一。樂用雅樂。三年復與天神合祀。皆躬行禮。先祭禮官奏祝文。太歲以下至四海凡五壇。稱臣者親署御名。其鍾山諸神稱余者。請令禮官代署。帝曰。朋友書牘尚親題姓名。况神

明乎。遂親署。後又定驚蟄秋分後三日遣官祭山川壇諸神。七年。令春秋仲月上旬擇日以祭。

詳星辰門禮志卷太

祖實錄

帝既以天下山川。附祭嶽瀆壇。又以安南高麗皆臣附。其國內山川宜與中國山川同祭。諭中書及禮官考定安南之山二十有一。曰佛蹟。曰徹圍。曰武寧。曰仙游。曰普賴。曰萬劫。曰傑特。曰安子。曰地覲。曰天養。曰神投。曰龍岱。曰文場。曰安獲。曰卞。曰立石。曰香象。曰崇。曰都隆。曰測。曰分。其江有六。曰川瀘。曰富良。曰



大黃曰大歷曰蘇歷曰三帶其水有六曰安石淵曰石龍門曰茲廉曰浪泊曰越裳宛曰九德宛高麗山有三曰魯陽曰蒿曰葦水有四曰川禮成曰鹽難水曰涓水曰馬訾水即鴨綠江也遂命著之祀典設位以祭六年正月祀琉球山川禮志參太祖實錄

遣使祭嶽鎮海瀆

太祖實錄

時遣都督孫遇遷等十八人以行帝皮弁御奉天殿視香祝躬署御名以授使者百官公服送至中書省使者奉以行金合貯香黃綺幡二白金二十五兩具

祭物牲用太牢幣各隨其方色祭畢鐫祝文於廟石

賜守祠者金

禮志參太祖實錄

明會典曰嶽鎮海瀆凡遇登極必遣官分投祭告

東嶽泰山山東泰安州祭西嶽華山陝西華陰縣祭中嶽嵩山河南河南府祭南嶽衡山湖廣衡州府祭北嶽恒山直隸真定府祭東鎮沂山山東青州府祭西鎮吳山陝西隴州祭中鎮霍山山西平陽府祭南鎮會稽山浙江紹興府祭北鎮醫巫閭山遼東祭東海山東萊州府祭西海山西蒲州祭

南海。廣東廣州府祭。北海。河南懷慶府祭。江瀆。四  
川。成都府祭。河瀆。山西蒲州祭。淮瀆。河南南陽府  
祭。濟瀆。河南懷慶府祭。

三年正月。遣使祀安南高麗。占城諸國山川。

太祖實錄

遣使之儀。與遣祭中國嶽瀆之使相類。更命各國圖  
其山川。及摹錄碑碣圖籍。付使者還。所至諸國。皆勒  
石紀其事。略曰。朕賴天地祖宗眷佑。位臣民上。郊廟  
社稷。以及嶽鎮海瀆之祭。不敢不恭。邇者占城安南  
高麗。遣使奉表稱臣。已封其王。則其國境內山川。悉

歸職方。古者天子望祭。雖無不通。然未聞有遣使致  
祭於其境者。今思與普天之下。共享昇平之治。故具  
牲幣。遣使往祭於神。神既歆格。必能庇其國王。世保  
境土。使風雨以時。年穀豐登。民庶得以靖安。庶昭一  
視同仁之意。

太祖實錄

六月。詔定嶽鎮海瀆諸神號。

禮志

帝躬署祝文。遣官以更定神號告祭。仍頒詔於安南。  
占城高麗。略曰。為治之道。必本於禮。嶽鎮海瀆之封。  
起自唐世。崇名美號。歷代有加。朕思英靈之氣。萃而



為神必受命於上帝。豈國家封號所可加。瀆禮不經。莫此為甚。今依古定制。並去前代封號。五嶽稱東嶽。泰山之神。南嶽衡山之神。中嶽嵩山之神。西嶽華山之神。北嶽恒山之神。五鎮稱東鎮沂山之神。南鎮會稽山之神。中鎮霍山之神。西鎮吳山之神。北鎮醫巫閭山之神。四海稱東海之神。南海之神。西海之神。北海之神。四瀆稱東瀆大淮之神。南瀆大江之神。西瀆大河之神。北瀆大濟之神。禮志參太祖實錄

十二月遣使祭南海。

太祖實錄

六年正月遣使祭江瀆之神。

太祖實錄

禮官言。往者四川未平。望祭江瀆於峽州。今川蜀既下。宜遣官詣南瀆大江神廟致祭。乃遣戶部主事王性中往祭。給白金二十兩。具祭物。太祖實錄

四月罷祭天下山川。各祀於其境。

太祖實錄

帝諭中書省及禮臣。始天下方定。其山川皆統祀於京師。然古者諸侯祭封內山川。今行省大臣與古方伯連帥無異。其境內山川當祭者。其定制頒行之。於是禮臣議嶽鎮海瀆禮秩尊崇。及京師山川皆國家

常典。非諸侯所得預者。各省惟祭風雲雷雨。及境內山川之神。宜共爲一壇。設二神位。以省臣初獻。都指揮司官亞獻。府官終獻。祭期。春用驚蟄後三日。秋用秋分後三日。每位。牲用羊一。豕一。籩豆四。簋簋二。爵三。釶。犧象尊各一。祝一。風雲雷雨帛四。山川帛二。凡祭。齋三日。制可。自是天下山川。皆各省官自祭。舊合祭京師。及四夷山川。悉罷之。惟甘肅新附。其山川仍祔祭京師。八年。禮部尚書牛諒言。京都旣罷祭天下山川。其四夷山川。亦非天子所當躬祀。中書及禮臣

請附祭各省。從之。廣西附祭安南。占城。真臘。暹羅。鎖里。廣東附祭三佛。齊瓜。哇。福建附祭日本。琉球。渤泥。遼東附祭高麗。陝西附祭甘肅。朶甘。烏思藏。京城更不復祭。又從禮官言。各省山川。居中南向。外夷山川。東西向。同壇共祀。禮志參太  
祖實錄

七年十一月。頒嶽鎮海瀆儀。於所在有司。太祖  
實錄

祭用羊豕一。帛一。隨其方色。籩豆簋簋皆四。釶一。爵

三。尊三。祭期。春二月。秋八月。上旬擇日。太祖  
實錄

九年正月。定王國祭山川禮。太祖  
實錄



山川壇建於端禮門外之西南。殿二。一以棲神。一以望拜。十三年。重定壇制。高四尺。廣三丈五尺一寸。四出陛。壇廣二十丈。高五尺。置櫺星門四。壇在壇內稍北。居三分之一。外垣南門置屋。列戟十二。北神門無屋。十八年。定祭儀。同社稷。惟不瘞毛血。二十三年。定王國有嶽鎮海瀆者。凡祭。以嶽爲正。鎮海瀆次之。風雲雷雨之神。又次之。既。又命東海。則燕齊皆祭。東嶽。東鎮。齊魯皆祭。西海。秦蜀皆祭。晉祭北海。又詔公侯府第。俱立壇。祭本處山川。以御製祭文。並神壇圖式。

頒之。

太祖實錄

復定山川壇制。

禮志

嶽鎮海瀆。鍾山與太歲。風雲雷雨爲七壇。居正殿。京畿山川。與夏冬月將。列東廡。春秋月將。及京都城隍。列西廡。正殿親祭。兩廡遣官分獻。詳星辰門禮志

八月。分遣國子生修嶽鎮海瀆祠。

太祖紀

帝諭禮臣。嶽鎮海瀆。祀典所重。所在祠宇。宜致尊嚴。以稱神居。於是分遣國子生周渭等三十一人。往修祠宇。各賜巾衣靴襪。俾所至齋沐而後行事。仍命禮

部嶽鎮海瀆之祀。凡遣官行禮。及所在有司致祭。勿與京師同日。二十二年。命工部遣官修中嶽祠宇。

太祖

實錄

十年六月。命大臣十八人。分祀嶽鎮海瀆。賜之制。

禮志  
參太

實錄

韓國公李善長祀中嶽。魏國公徐達祀北嶽。曹國公李文忠祀東嶽。宋國公馮勝祀西嶽。江夏侯周德興祀南嶽。吉安侯陸仲亨祀東鎮。延安侯唐勝宗祀西鎮。江陰侯吳良祀南鎮。濟南侯顧時祀北鎮。平涼侯

費聚祀中鎮。陸安侯王志祀東海。營陽侯楊璟祀西海。永嘉侯朱亮祖祀南海。潁川侯傅友德祀北海。宜春侯黃彬祀江瀆。南安侯俞通源祀河瀆。中山侯湯和祀淮瀆。宣寧侯曹泰祀濟瀆。制曰。百神之祀。乃國家之先務。朕與卿等。當羣雄角逐。戰勝攻取。非天地昭鑒。嶽鎮海瀆效靈。安得至是。今孟秋在邇。理宜報祭。古者人君巡狩。則祭名山大川於方嶽之下。今國家新造。民生始遂。朕未獲親往。特命卿等代朕以行。

太祖  
實錄



十一年正月。以封建諸王。遣使祭蜀湘諸國山川。太祖實錄

時封皇子椿為蜀王。柏為湘王。桂為豫王。祺為漢王。

植為衛王。改封吳王。櫛為周王。太祖紀

二十一年六月。遣神樂觀道士解牲初祭雲南境內山

川。太祖實錄

成祖永樂元年九月。修中嶽嵩山廟。成祖實錄

七年二月。封南海神為寧海伯。成祖實錄

時遣使往諸蕃國。神屢著靈應。故封之。成祖實錄

十八年十二月。北京山川壇成。成祖實錄

明年正月。命黔國公沐晟詣壇。奉安太歲諸神。及山

川諸神主。位置陳設。與南京舊制同。惟正殿鍾山之

右。增祭天壽山之神。成祖實錄 參會典

英宗正統三年八月。修南嶽祠。英宗實錄

巡按御史陳祚言。南嶽神廟頽敗。請撤去殿宇像設。

依祀山川例。為壇以祭。禮臣重興革。不允其請。仍命

大吏督有司修復。至景泰六年十月。再修。英宗實錄 參景帝實

錄

孝宗弘治六年七月。兵部尚書馬文升。請改祀北嶽於

渾源州不允。

孝宗實錄

文升言。北嶽恒山。在今大同府渾源州。宋有天下。未能混一。北爲契丹所有。故祭北嶽於真定府曲陽縣。迨我太宗遷都北平。而真定乃在京都之南。當時禮官亦未建明。猶祭北嶽於曲陽。臣考周禮載恒山爲并州之鎮。在正北。我朝一統志亦載恒山在渾源州南三十里。卽北嶽。以此觀之。則北嶽當在渾源州無疑。今本州北嶽廟趾猶存。乞勅禮部詳考。移文山西守臣。於渾源州恒山舊趾。修建北嶽廟。以後歲祭於

此行禮。下禮臣議。以爲祀北嶽恒山於曲陽。歷漢唐宋以至國朝。幾三千年。未之有改。其渾源州雖有恒山。亦名北嶽。然祀典不聞。碑誌無考。况今恒山實爲畿內鉅鎮。孕美已久。一旦廢此舉。彼恐有窒礙。如文升所奏。渾源州恒山。旣爲一方之望。古蹟間存。其洪武年間重修廟宇。年久頽敝。請下所司。量加修葺。春秋致祭。用垂悠久。從之。世宗嘉靖初。科臣陳棐復請改祀。不允。神宗萬歷十四年。巡撫胡來貢再請。禮臣據大明集禮定議。仍祀曲陽。

孝宗實錄  
王圻本禮志



世宗嘉靖二年三月遣官祭東嶽。世宗實錄

六年詔建河神祠於沛縣。世宗實錄

時漕河復通議者以為神助請復其故宇春秋致祭

工部以請從之。世宗實錄

七年二月遣官祭河神。世宗實錄

先是六年十二月河南靈寶縣黃河清五十里至是

遣太常寺官齋祝往祭。世宗實錄

八年八月始親祭山川著為令。詳星辰門世宗紀

十年七月改建地祇壇。會典

先是分雲雨風雷為天神嶽鎮海瀆陵山及京畿天

下名山大川為地祇至是合建壇於先農壇南天神

在左南向地祇在右北向又加祖陵山曰基運皇陵

山曰翊聖孝陵山曰神烈顯陵山曰純德與嶽鎮海

瀆并祀凡五壇從壇二京畿山川西向天下山川東

向以丑辰未戌年親祭餘年遣大臣攝祭。世宗實錄

二十六年十月命祀小孤山神。世宗實錄

先是獻皇帝舟次小孤製詩一篇留廟中至是勒詩

於石建亭藏之廟故士民私建為小姑神女像命改

攝祭古壇注  
至見星  
辰門  
十

按字三如臣等謹  
三字  
十七

用木主。題小孤山之神。賜額曰小孤山廟。今有司春

秋致祭。又聖母舟過。曾遣致茶果。留龍盤三。彩盤九。

即用以盛祭品。龍盤饗食一。麥餅二。彩盤果五。蔬四。

牲用少牢。帛一。爵三。著為令。世宗實錄

穆宗隆慶元年正月。罷祀山川壇。詳星辰門禮志

六年三月。詔祀沿河水神諸廟。穆宗實錄

從工部尚書朱衡請也。穆宗實錄

祭山川儀。詳星辰門

按明初建山川壇。嶽瀆山川。與太歲諸神同祀。其

後改天神地祇壇。或分或合。祭儀則同。已見星辰

門。不重載。

遣官祀嶽鎮海瀆山川城隍儀。

齋戒降香。陳設正祭。俱如祭太歲儀。惟迎神瘞毛血。

改望燎為望瘞。明集禮





